

**Regional News Unit AIR Aizawl**  
**Tuesday, July 02, 2024**  
**Time - 7:30 -7:40Hrs**  
**REGIONAL NEWS BULLETIN**

**HEADLINES (MORNING)**

- **Kawthalo ti tawp tura inzirtirna, Stop Diarrhoea Campaign chu nimin khan Mizorama hman turin hawn a ni.**
- **Sawrkar laipui Dan thar siam, New Criminal Laws of India 2023 chu ram pumah hman tan a ni ta .**
- **Union Home Minister Amit Shah chuan Criminal laws thar pathum chuan ramchhunga misual chung a rorel dan thar a thlen dawn a ti.**
- **Indian Meteorological Department chuan July thla chhungin rampumin ruah a dawn zat chu a pangngai aia tam a ni dawn niin a sawi.**

<><><>

**STOP DIARRHOEA CAMPAIGN**

**Kawthalo ti tawp tura inzirtirna, Stop Diarrhoea Campaign chu nimin khan Mizorama hman turin hawn a ni.**

**Stop Diarrhoea Campaign hi district hrang hrangah hawn a ni a, a hawna pui ber Aizawla neih ah Dr. Eric Zomawia, Mission Director, National Health Mission chuan hun a kaihruai a, Dr. Lily Chhakchhuak, State Programme Officer, RCH chuan ‘STOP Diarrhoea Campaign’ chungchang a sawifiah a ni.**

**Stop Diarrhoea Campaign hi thla hnih chhung neih tur a ni a. Hemi chhung hian ASHA ten an area chhunga In tin tlawhin naupang kum nga hnuailam te tan ORS leh Zinc tablet an sem dawn a. District Hospital, PHC, CHC leh Sub Centre ah te ORS leh Zinc mamawh tan lak theihna counter siam a ni dawn a. School ah te kut silfai a pawimawhna te in zirtir a ni baw k ang.**

<><><>

**REMNA NI OBSERVED**

**Remna Ni vawi 38-na chu nimin khan MNF leh Congress Party ten a lawmna hun an hmang.**

**Remna Ni June ni 30 chu kumin hian Pathianni a a tlak avangin MNF leh Congress te chuan a lawmna hun hi nimin khan an hmang a, MNF ten Hnam Runa a lawmna hun an hmanah MNF President, Pu Zoramthanga chuan, remna ah tumah ral bang bik awm lovin, Mizo mipuite an tel vek a ti a, a humhim pawh mitin mawphurhna a ni, a ti.**

**Remna nei tura kil tin atanga palai, kohhran mi, zirlai pawl leh mi chi hrang hrang thahnemngaite hnathawh te leh thil tam tak thleng te chu Pathian remruat a lo ni zel a, remna chu India emaw Mizo mipui duhthusam emaw a ni lova, an pawmtlan theih tura duan a ni a ti.**

Congress Party ten Congress Bhavan-a 'Remna ni champha an lawmna ah pawh, MPCC President, Pu Lal Thanzara'n inlawmna thu a sawi bakah Pu Liansuama, President, Former Legislators Association of Mizoram chuan thu sawi in, Remna atan remna a awm theih nan Central lama hotuten Pu Hawla'n CM nihna a kian dawn a tih khan mak an tih thu leh, inremna atana lalthutthleng ken chu inpekna vawrtawp atang lo chuan a theih loh a ni a ti a, an hotute khan anmahni inhlan in, mellung pawimawh tak an phun a ni a ti.

<><><>

## **SOCIAL WELFARE MINISTER**

Social Welfare Minister Pi Lalrinpuii chuan Lungleia District Child Protection Unit tlawhin an hmalakna leh an hmachhawpte a enfiah.

DCPO Office a tlawnnaah Minister Pi Lalrinpuii chuan DCPO ten an tha tichak turin inpawh tlan a pawimawh thu a sawi a, naupangte chu chhantu nei ve lo an nih angin an rinchhan ber chu DCPU te an ni tih hria a mawhphurhna sang tak nei an ni tih inhre reng turin a chah a, ram inrelbawlnaah Mizoram sawrkar chuan hma a la chho mek a, sawrkar hnathawkte pawh tha taka thawh a ngai tawh dawn a ni a ti bawk.

Nimina DCPO office a tlawh chuan awmzia nei se tiin naupang enkawl ngaite enkawla dahna tur siam belh dan tur ruahmanna a siampui nghal a ni.

<><><>

## **AR SENTINNEL CUP**

Assam Rifles Sentinels Cup 2024 chu nimin khan Nagaland Dimapur a ARTC & S ah hawn a ni.

He infiamna hi armed force leh tualchhung mite inpawh tlanna tur leh talent haichhuahna tura Assam Rifles hmalakna a ni a,

Major General Manish Kumar, SM\*, IGAR(N) chuan footballa inelna hi a hawng a, Hmarchhak bial state hrang hrang atanga tel team ten thutiam an chham a ni.

Tem inel tur te hi

- (a) Arunachal Pradesh (Patkai Warriors)
- (b) Mizoram (Panthers FC)
- (c) Meghalaya (Black Dynamite)
- (d) Nagaland (Viswema FC)
- (e) Manipur (Vikings FC)
- (f) DGAR Team
- (g) 164 TA (H &H)
- (h) 165 TA (H&H) an ni.

<><><>

## CRIMINAL LAWS OF INDIA 2023

Sawrkar laipui Dan thar siam, New Criminal Laws of India 2023 chu ram pumah hman tan a ni ta a.

He dan tharah hian IPC tih thin chu Bharatiya Nyaya Sanhita (BNS) 2023 tia thlak a ni a; CRPC chu Bharatiya Nagarik Suraksha Sanhita (BNSS) ni tawhin Indian Evidence Act ni thin pawh Bharatiya Sakshya Adhiniyam (BSA) a ni tawh dawn a ni.

He Dan thar hman tur chungchangah hian Akashvani chuan Dan hre mite leh Dan zirna hmun, Govt. Aizawl Law College-a zirtirtute a kawm a. Anni chuan he Dan thara hmanga thil inthlak hrang hrang te an sawi a. Dan hman lai mek chuan tunlai thiamna leh hmasawn mekna a pha tawh lo nia sawiin, a thlakna tur Dan tharah chuan pawikhawihna thenkhat hremna tihsan a ni a, harsatna thenkhat thuneihnain a huam chin tichiingin Dan bung leh chang hman tlak tawh loh te paih a ni, an ti.

He Dan tharah hian hmeichhia leh naupang chungga pawikhawihntute hremna dah belh a ni a; Penal Code mi hrem theih nana hmasa ber atan Vantlang hna thawhtir a rawn dah thar a; a hmaa IPC ni thin nena danglamna lian zualah dan bawhchhiatna jail tan theihna chi 33 a awm belh a, heng bakah hian dan bawhchhiatna sum leh pawisa chawitir theihna chu 83-in a tam ta zawk a ni.

He dan thar hman tur chungchangah hian IGP Pu Lalbiakthanga Khiangte chuan dan thar tha tak tak hmang tangkai theitu chu mipuite an ni tih sawiin mipuite hamthatna atana dan siam anih ang ngeia hman tangkai a pawimawh a ti a, mipuiten ngaihven a pawimawh a ti bawk.

Sawrkar laipuiin dan thar July ni 1 atanga hman tura a duan 3 chungchang sawihona hi Akashvani chuan kar tin Inrinni tlai dar 4 atanga dar 4:30 chhungin a tichhuak thin a ni.

<><><>

## CRIMINAL LAWS ENFORCED IN MIZORAM

Dan bawhchhia te hremna dan thar pathum hi Mizoramah pawh hman tan nghal a ni a, Bharatiya Nyaya Sanhita (BNS) hnuaiah case hmasa ber Champhai Police station ah ziah luh a ni.

FIR ziah luh hi CCTNS hnuaiah niin Indian Penal Code (IPC) ni thin Bharatiya Nyaya Sanhita (BNS) tia thlak tak hnuaiah ziah luh a ni a, nimin chawhma dar 10 leh chanve khan an ziah luh a ni.

He dan thar hman tur pual hian nimin khan Mizoram hmun hrang hrangah hun hman a ni a,

He ni puala Serchhipa hun buatsaih chu Home Minister Pu K.Sapdanga chuan a hman pui a, dan thar chuan mipui mimir te thlavang na takin a hauh a, police te tha ti chakin sual hmeh mih nan sual lakah nasa takin a thikthu a tichhia a ti a, ram leh mipui tana dan tha tak a ni dawn tih a sawi.

Aizawlaah chuan DGP Anil Shukla chuan Sawrkar laipuiin dan thar a siam kengkawh turin Mizoram Police an inpeih fel tawh a ti a, he dan thar hmang thei tur hian hun rei tak inpuahchahna nasa takin kalpui a lo ni tawh tih sawiin Pawi khawitu te hremna chungchangah he dan thar hian danglamna nasa tak a thlen dawn tih a sawi.

DGP chuan Electronic FIR pawh hman tan a ni dawn a ti a, case chin fel hun bituk siam chuan nasa takin thil a ti awlsam dawn tih sawiin dan thar hman tur ah tunlai thiamna thar technology chu nasa takin sulhnu chhui na leh evidence atan hman tangkai a ni dawn tih a sawi bawk.

Siaha ah chuan SP Pu K.L. Vulmawia chuan Criminal Laws thar kalpui tur chu mi tin te dikna chanvo min hriattirtu a ni a ti a, dan chu himna min petu zawk a ni tiin dan chungchangah mipuite thangharh a hun tawh hle a ni a ti bawk.

Kolasib ah chuan District Jail-ah hemi pual hian hun hman ani a, Dan thar pathuma thil langsar leh pawimawh zual te sawifiah niin inzirtirna hun hman a ni.

Mamit ah chuan SP Conference Hall ah New Criminal laws tlangzarhna leh zirchianna hun hman a ni a, SP Pi Lalthangpuii Pulamte chuan dan hriatna chuan inrintawkna min neih tir tur ani tih sawiin mi tin tan dan siam chu zir chian a pawimawh tih a sawi.

<><><>

#### AMIT SHAH ON NEW CRIMINAL LAWS

Union Home Minister Amit Shah chuan Criminal laws thar pathum chuan ramchhunga misual chung a rorel dan thar a thlen dawn a ti. New Delhi-a chanchinbumite a kawmnaah Pu Shaha chuan nimin atanga hman tan criminal law tharte hi ramchhung mil liau liau anih thu sawiin ram zalen hnua mipui sukthlek mila siam a ni a ti a. Dan thar chu thubuai ngaihtuah a ti chak dawn a, pawikawhina tuartu tan dikna chanvo a hum sak ang a ti a. Dan hmasa kha chuan Police te chanvo chauh a hum thin a, tuna dan thar erawh hi chuan pawikhawhina tuartu leh thubuai thehluttu chanvo pawh a hum dawn a ni a ti. Hei bakah hian Pu Shaha chuan hmeichhia leh naupangte chu dan thar hian a ngai pawimawh hle a ti bawk a. Mipui thinrimin mi chung a kut anthlak thin pawh a khap tlat a ni a ti.

<><><>

#### IMD

Indian Meteorological Department chuan July thla chhungin rampumin ruah a dawn zat chu a pangngai aia tam a ni dawn niin a sawi. IMD sawidanin ramchhung hmun thenkhatah ruah a tla nasa dawn a, chutihrualin hamrchhak hmun thenkhat, hmarthlang, chhak lam leh chhimchhak lamah erawh a pangngai aia tlem a tla thung dawn a. Hei bakah hian July thla chhunga khawlum zawng hi a pangngai normal aia sang a ni dawn tih sawi bawkin ramchhung hmarthlang, hmun thenkhat leh ram laili lai bakah chhim chhak lam hmun thenkhat erawh a huam lo ang.

<><><>

#### PARLIAMENT

Nimin Lok Sabha thutkhawmah President Draupadi Murmu-i thusawi chungchanga lawmthu sawina motion sawiho a ni a. House-a thutkhawm tan anih hian Leader opposition Leader Rahul Gandhi-a chuan NEET exam thil diklo awm chungchanga puhna chu sawiho a phut a. Parliament atangin rampumah NEET chungchanga thuchah neih a duh thu a sawi a. An thil phut tihhlawhtlin anih loh avangin Opposition memberte hi lungawiloin house atangin an chhuak a ni.

**BJP MP Anurag Thakur-a chuan thusawiin Prime Minister Narendra Modia kaihhruaina hnuaia kum 10 chhunga sawrkar hmalakna hrang hrangte a fak a. Mipuite hamthatna tur leh ram a hmasawna turin sawrkarin kawng tinrengin hma a la a ni a ti.**

<><><>